

## ABENDUALDIKO IV. IGANDEA (B)

### Otoitza

Isur ezazu, Jauna, gure bihotzetan zeure grazia;  
 eta, aingeruak esanik,  
 zure Seme Jesu Kristo gizon egin dela jakin dugunoi,  
 iguzu, Haren nekaldi eta gurutzearen bidez,  
 irits gaitezela biztueraren ospera.  
 Zure Seme Jesu Kristo.

I. IRAKURGAIA: 2 Sm 7, 1-5. 8b-12. 14a. 16

*Dabiden erreinuak betiko iraungo du Jaunaren aurrean.*

Samuelen liburutik

Dabid erregea bere etxean bizi zela, eta Jaunak inguruko etsai guztietatik bakea eman zionean, honela esan zion erregek Natan profetari: «Begira, ni zedrozko etxean bizi naiz; Jaungoikoaren kutxa, berriz, larruzko txabolan».

Natanek erantzun zion erregeri: «Zoaz eta egizu bihotzak eskatzen dizun guztia, Jauna zurekin dago eta».

Baina gau hartan bertan Jaungoikoaren hitza etorri zitzaion Natani: «Zoaz eta esaiozu nire morroi Dabidi: "Hau dio Jaunak: Zuk eraiki behar al didazu etxea, nire bizileku izan dadin? Nik atera zintudan zeure larreetatik, artaldean atzetik, nire herriaren buru izan zintezan. Zurekin izan nauzu, ibili zaren alde guztietan. Nik garbitu dizkizut aurretik etsai guztiak. Eta Nik emango dizut zuri izen haundia, lurreko haundikiena bezalakoa. Leku bat emango diot Nik nire herri Israeli; han landatuko dut bera; leku hartan iraungo du, eta ez du gehiago estualdirik izango; gaizkileek ez dute zapalduko, hasiera hartan bezala, epaileak nire herriaren gain ipini nituen hartan bezala. Bakea emango dizut, etsai guztietatik. Haundi egingo zaitut eta jatorria sortuko dizut.

Zure egunak betetzen direnean eta zure gurasoekin atsedean hartzen duzunean, ondorengo bat emango dizut, zeure erraietatik aterea, eta sendotu egingo dut haren erreinua. Aita izango nau hark Ni, eta hura seme izango dut Nik.

Zure etxeak eta zure erreinuak betiko iraungo dute nire aurrean, eta zure errege aulkiak sendo iraungo du beti"».

ERANTZUN SALMOA: Sal 88, 2-3. 4-5. 27 eta 29

**R/. Jauna, zure maitasuna abestuko dut  
betiren beti.**

Jauna, zure maitasuna abestuko dut betiren beti,  
zure leialtasuna adieraziko gizaldiz gizaldi.  
Esana baituzu: «Maitasuna betiko dut eraiki»,  
zure leialtasuna zeruan duzu sendo erazi. R/.

Egin dut nire hautatuarekin ituna,  
Dabid nire morroiari zin egin niona:  
«Betiko sendotuko dut zure hazia,  
menderen mende eraikiko zure aulkia». R/.

Berak deituko nau: «Zu zaitut Aita,  
ene Jainko, nire salbamenaren Harkaitza».  
Gordeko diot beti nire maitasuna,  
zintzo edukiko, egin nion ituna. R/.

II. IRAKURGAIA: Erm 16, 25-27

*Betidaniko gizaldietan ezkutuan egon den misterioa,  
orain agertua izan da.*

San Paulo Apostoluak Erromatarrei

Senideok: Jesu Kristoren berri ona dela eta –betidaniko gizaldietan ezkutuan egon den misterioa,  
baina orain Profeten bidez agertua izan dena, eta betiereko Jaungoikoaren erabakiz adierazia, atzerri  
guztiak sinesmenera erakarriak izan daitezen–, hau da: nik hotsegiten dudan Ebanjelioaren arabera,  
indar zaitzaketen Jaungoikoari, jakintsu bakarrari, aintza Jesu Kristoren bitartez, gizaldi eta  
gizaldietan. Amen.

EBANJELIOA: Lk 1, 26-38

**Alleluia:** Lk 1, 38b

R/. Alleluia.

V/. Hona hemen ni, Jaunaren mirabea;  
gerta bekit zuk diozun bezala. R/.

*Begira, sabelean sortu eta semea izango duzu.*

## Jesu Kristoren Ebanjelioa San Lukasen liburutik

Aldi hartan, Gabriel aingerua bidali zuen Jaungoikoak, Nazaret deritzan Galileako herri batera, birjina batengana; Dabiden etxeko Joserekin ezkontzeko hitzemana zegoen birjina, eta Maria zuen izena. Aingeruak, haren etxean sartuta, esan zion: «Poztu zaitez, graziaz bete hori: Jauna zurekin». Ikaratu zen Maria hitz haiek entzutean, eta pentsatzen jarri zen, zer ote zitekeen halako agur hura.

Aingeruak, orduan: «Ez izan beldurrik, Maria; Jaungoikoaren ederra aurkitu duzu. Begira, sabelean sortu eta semea izango duzu; eta "Jesus" ezarriko diozu izen. Haundia izango da; Goigoikoaren Seme deituko dute; eta Jainko Jaunak Haren aita Dabiden errege aulkia emango dio; Jakoben etxean errege izango da beti, eta Haren erregetzak ez du azkenik izango».

Baina Mariak orduan aingeruari: «Nola daiteke hori? Nik ez baitut ezagutzen gizonik». Eta aingeruak: «Espiritu Santua jaitsiko da zuregana, eta Goigoikoaren indarrak bere itzalpean hartuko zaitu; horregatik zuregandik jaioko den Santua, Jaungoikoaren Seme deituko dute. Hara, zure ahaide Isabel ere, bere zaharrean, haurdun dago; eta agorra omen zena seigarren hilabetea aurkitzen da; Jaungoikoarentzat ez baita ezer ezinik».

Mariak orduan: «Hona hemen ni, Jaunaren mirabea; gerta bekit zuk diozun bezala». Orduan aingeruak utzi egin zuen.

### **Oparigaien gainekoa**

Jauna, Maria dohatsuaren sabel garbia  
bere indarrez bete zuen Espirituak  
santu egin bitza  
zure aldarean jarri ditugun eskaintzak.  
Jesu Kristo.

Prefazioa: Abendualdikoa.

### **Jaunartze ondorengoa**

Betiereko erospenaren agiria harturik,  
eskatzen dizugu, Jainko ahalguztiduna:  
zenbat eta hurbilago izan salbameneko jaia,  
hainbat eta gartsuago presta gaitezela  
zure Semearen jaioteguna ospatzeko.  
Jesu Kristo.